

Calcem Saturni, welcher per se vnd nicht mit sulphure gemacht sey / mit einem starcken Essig / vnd laß solchen in arena, oder warmer Aschen digeriren vnd solviren / so lang biß sich der Essig gelb von dem Saturno gefärbet hat / vnd ganz süß davon worden ist. Darnach giesse die klare solution ab / vnd einen andern Essig darauff / vnd laß solchen auch solviren / dieses wiederhole so oft / biß der Essig nicht mehr solviren / vnd süß werden will / dann nimbt alle solutiones, vnd laß alle Feuchtigkeit da von rauchen / so bleibt ein dicker süßer gelber Saft / dem Honig gleich / wann der Essig nicht ist distillirret gewesen / so er aber ist distillirret vnd klar gemacht gewesen / so bleibt kein liquor, sondern ein weisses süßes Salz. Dieses Salz oder liquor kan dann wie bey dem Zinck gelehret ist / distillirret werden / so gehet nit allein ein penetrirlicher / subtiler Geist über / sondern auch ein gelbes Oleum, welches aber nicht viel / doch sehr kräftig ist / in allem zu gebrauchen / gleich wie von dem Spiritu vnd Oleo vom Zinck gelehret worden. N.B. Dieses ist zu mercken / daß man zu diesem Spiritu vnd Oleo zu machen / keinen distillirten Essig von nothen hat / sondern kan eben so wol mit einem vndistillirten gethan werden / vnd gibt ein vndistillirter Essig auch mehr Oel / als ein distillirter. So man aber ein weiß vnd klar Salz suchet / so muß der Essig distillirret seyn / sonst scheint es nicht in Crystallen / sondern bleibt ein gelber liquor dem Honig in allem ganz gleich / vnd ist auch nicht von nothen / daß die Solution in
H. iiiij Glä.